

Plan di maneho di Parke Marino defini prome cu fin di aña



ORANJESTAD – E proximo dos siman lo ta crucial pa e proyecto di Parke Marino, cu minister Otmar Oduber di Medio Ambiente lo desea di bira realidad. Den e periodo aki nan lo sigui tene reunion cu e diferente socionan, pa defini e maneho di e Parke Marino. E mandatario ta spera cu por haci e anuncio riba e plan di maneho di e Parke Marino prome cu fin di aña.

A persar di e preocupacion cu

Centro di Pesca Hadicurari a yega di vocifera, pa medio di e representante di e piscadonan, sr. Faro, tocante e proyecto gubernamental di un Parke Marino na Aruba, minister encarga cu Medio Ambiente a laga sa cu e preocupacion aki a keda atras.

El a laga sa cu e proyecto aki tin dos aspecto cu ta wordo desaroya. Un di nan ta e aspecto legal of cuadro legal, den cual ya caba nan a bay Raad van Advies (RvA) pa ricibi nan conseho riba e

proyecto. Pa motibo cu no ta trata di un landsverordening nobo, sino cu e ta un landsbesluit cu tin cu sali, el a bisa. Pero – segun e mandatario – loke mas ta hala atencion di e usuarionan cu ta bay haci uzo di e area (nan) di e Parke Marino, ta e plan di maneho cu tambe ta mara legalmente.

Plan di maneho

E ta cualifica esaki como curason di e proyecto. Ainda esaki no a wordo defini. Segun e mandatario, nan mester bisa kico ta e maneho den e parke, kiermen kico ta permiti y kico ta prohibi. Tambe kico ta protegi y den cual temporada si y den cual temporada no por wordo desaroya cierto actividad den e area (nan) cu ta cay regarda den e Parke Marino. E parti crucial aki ta bay tuma luga den e proximo dos siman, asina e mandatario a anuncia caba.

Sr. Oduber a laga sa cu nan a sostene diferente reunion cu e piscadonan, y e mes a participa den shete encuentro na diferente puntonan cu

piscadonan. Den e reunion aki a participa representante di minister Chris Romero, kende ta encarga cu e sector primario, entre nan pesca. Nan a inventarisa tur e papelnan cu nan a haya y e documentonan of formulario cu e propio piscado a yena.

E ta calcula cu den e reunionnan aki nan a topa cu mas di 150 piscado. Nan a sinti ainda cu tin varios preocupacion te hasta pafo di e pensamiento di e Parke Marino cu a bin dilanti. Un preocupacion grandi tin di haber cu e uzo di reda. Nan a duna oportunidad pa e piscadonan presente por entrega formularionan pa esunnan cu tabata interesa pa pone nan preocupacion por escrito. E mandatario a indica cu asina aki, e piscadonan ta duna alternativa pa yuda gobierno den e proceso pa bin cu un Parke Marino. Especialmente kico mester evita y protege di nos fauna y flora marino pa forma e maneho di e parke aki.

Tambe el a anuncia cu lo sinta

hunto cu e organisacionnan di buceadonan y tur e persona involvi den e actividad aki. Pero tambe di tur otro instancia cu ta bay haci uzo di e Parke Marino y awa territorial. Tambe nan lo reuni cu e diferente organisacion no gubernamental (NGO's) den diferente nivel, entre nan esunnan cu ta percura pa proteccion di nos parhanan, turtuganan, etc., pa di e forma ey definitivamente forma e plan di maneho di e parke aki, cu ta un parti integral di e ley. Sr. Oduber ta spera cu prome cu fin di aña nan lo por bin cla cu e plan aki, y cu esaki lo bay resorta bou e fundacion cu ta atende cu Parke Nacional Arikok (PNA), cu recientemente a conoce cambio y te hasta di e sindicato cu ta representa nan trahadonan. E mandatario a laga sa cu cambionan grandi ta tumando luga den PNA. Awor e fundacion aki tin un directiva cu tin contacto hopi estrecho cu e ministerio. Nan ta atendiendo cu e diferente inkietud cu ta biba den parke.